


von Wulf Wager

Tarzan - ein Drama!



Zwischen de Jahr hend mei propere Nachbete ond ihr Ma Bsuech von Fraind aus Südtirol ghet. Ja, dia hend au Freind! Weil dia dene ebbes bsonders hend bieta wella sennd se an Nuijohr mittags om drei en da Weltweihnachtzirkus ond am 2. Januar au en d' Mittagsvorstellung von Tarzan, en Maireng domma.

Dr Ma von meira propere Nachbete isch felsafescht drvo ibrzeugt gwää, dass dia Vorstellung au om drui afgangt. Also send se so zeitig en en's Theater g'fahra, dass se vor dr Vorstellung no a Gläse Sekt hend drenka kenna.

Sia hend sich scho gwondert, dass dia Parkplätz relativ voll, aber wenig Leut ondrwegs warat. Wo se no parkt hend, send a paar an dene vorbei gspronga, wia a gsenge Sau. Gemiatlich isch mei propere 150-Kilo-Prachtsochbete no gschwend ufs Clo – weil se so a Konfirmandabläse hot – ond isch no mit dr ganza Blös dia Stiaga ens Theater nuf. Ihr Ma hot sich scho gwondert, dass do außer ihne koiner om da Weg war. Vorsichtshalber hot'r nomol uf dia Ticket guckt, on - schla en 's Blechle – do isch gstanda, dass die Vorstellung schon um 14.30 beginnt. On jetzt war's scho 14.33. "Sia kenntat uf koin Fall me nei, erscht noch zwanzig Minuta dädat se se en dia Vorstellung lasa", hot der freindliche Kartaabreißer gsait.

Jetzt hättat 'r amol mei propere Nachbete seha solla. Dia hätt ihren Ma mit ihre Blick schier gfressa. Was er denn für a Riesarendvieh sei, dass 'r net amol Ticket lesa kennt. Er sei z' bleed zom gradaussoicha. Dui war so narrat, dass se sogar mit ihre Südtiroler Fraid 's hendla hot ag'fanga, wo dia ihren Ma vor ihrer Grobheit en Schutz gnomma hend. Wutenbrannt isch se no drvor ond mit dr Taxe hoimgfara. Ihr Ma on dia Südtiroler Fraind hend noch zeah Minuta nei derfa ond a wondscheene Vorstellung geht. Net bloß wegam Tarzan. Noi, sia hend oifach au meh Platz zom sitza ghet.

Bis näggschd Woch'

Ihr

Wulf Wager

